

艺
文
类
聚

艺

文

类

聚

藝文類聚卷第三十九

唐太子率更令弘文館學士歐陽詢撰

明

秣

陵

王元貞校

禮部中

巡狩燕會

籍田封禪

社稷親蠶

朝會

巡狩

禮記曰王者必制巡狩之禮何尊天重民也所以五年一巡狩何五歲再閏天道大備王者思亦當竟也所以至四嶽者盛得之四方之中能興雲致雨也又曰天子五年一巡狩二月東巡狩至于岱宗柴而望祀山川覲諸侯問百年者就見之命太師陳詩以

觀民風命市納賈以觀民之好惡

易曰先王以省方觀民設教

尚書曰歲二月東巡狩至于岱宗柴

傳曰天子非展義不巡狩

注云巡狩所以布德展義

周禮曰職方氏掌天下之圖王巡狩則戒于四方攷

職事無不敬戒

風俗通曰巡者循也狩者守也道德太平恐遠近不

同化幽隱有不得所者故自躬親行之

白虎通曰巡狩所以時出何當承宗廟故不踰也以

夏之中月同律度得其中也

越絕書曰禹巡狩大越見耆老納詩書審鈐衡平斗斛

漢書曰元封五年冬行南巡至于盛唐望祠虞舜于九疑登天柱山自尋陽浮江親射蛟江中獲之舳舻千里薄樅陽而出作盛唐樅陽之歌

東觀漢記曰章帝東巡至岱宗祀五帝於汶上

黃帝太一察推曰欲先知巡之年當視太一與白在四維之歲爲狩

蔡邕獨斷曰巡狩校獵還公卿以下陳雒陽亭前街上乘輿到公卿以下拜天子下車公卿親識顏色然

後還宮古語曰在宮帷下唯此時施行

摯虞新禮儀曰魏元氏巡狩故事新禮守方岳柴望告至設壇諸侯之覲者乃摯皆如儀而不建旗臣虞謹按覲禮天子各建其旗旗章所以殊爵命視等威也詩稱君子至止言觀其旂宜定新禮建旗如舊三齊略記曰堯山在廣固城西七里堯巡狩所登遂以爲名山頂立祠祠邊有柏樹枯而復生不知幾代樹也

詩隋虞世南和幸江都詩曰南國行周化稽山秘夏圖白王豈殊軌千載協前謨肆敬遵時豫順動悅來

蘇安流進畫舫戒道翼金吾龍旂煥辰象鳳吹溢川
塗封唐昔敷錫分陝被荆吳沐道咸知讓慕義久成
都冬律初飛管陽鳥正銜蘆巖飈肅林薄暖景澹江
湖鴻私浹幽遠厚澤潤凋枯虞琴起歌詠漢筑動巴
歛多幸霑行葦無庸類散樗

隋虞世基和幸江都詩曰巡遊光帝典征吉乃文先
澤國翔宸駕水府汎樓船七華榮長薄三翼旦通川
夙興大昕始求衣昧旦前澄瀾浮曉色遙林卷宿煙
晨霞稍含景落月漸虧弦迴塘響歌吹極浦望旌旃
方陪覲東后登封禪肅然

〔賦〕漢楊雄甘泉賦曰孝成帝時客有薦雄文似相如者上方祀甘泉泰畤雄從上甘泉故述斯賦惟漢十世將郊上玄乃命羣僚星陳而天行詔招搖與太陰兮伏鉤陳使當兵八神奔而警蹕兮飛蒙茸而走陸梁焱駭雲迅奮以方攘半散照爛粲以成章於是帥爾陰閉霅然陽開流星旄以電燭兮咸翠蓋而鸞旗臨高衍之崿崿超紆譎之清澄據軫軒而周流忽軼軋而無垠翠玉樹之青葱壁馬犀之璘璘歷倒景而絕飛梁浮蟻蠓而撒天曳彩虹之流離颺翠氣之宛延排玉戶而颺金鋪發蘭蕙與芎藭靡薜荔而爲席

折瓊枝以爲芳吸青雲之流霞飲若木之露英集乎
禮神之囿登乎頌祇之堂攀璇璣而下視行遊目乎
三危玉女亾所眺其清矚宓妃曾不得施其娥眉於
是欽柴宗祈燎薰皇天樵蒸炷上配黎四施選巫咸
兮叫帝闔開天庭兮延羣神於是事畢功弘迴車而
歸登長平兮雷鼓磕度三巒兮偈棠梨雲飛揚兮雨
霽霈于胥德兮麗萬世亂曰崇崇園丘隆隱天兮增
宮參差駢嵯峨兮上天之緯杳旭卉兮聖皇穆穆信
厥對兮來祇郊壇神所依兮輝光炫燿降厥福兮子
子孫孫長無極兮又幸河東賦曰其三月將祭后土

上乃帥羣臣橫大河湊汾陰既祭畢登歷觀陟西嶽
以望八荒迹殷周之墟眇然以思唐虞之風雄以爲
臨川羨魚不如歸而結網還上河東賦以勸其辭曰
曰伊年暮春將瘞后土禮靈祗謁汾陰於東郊乃撫
翠鳳之駕馳先景之乘棹奔星之流旃攬天狼之威
弧奮電鞭驟雷輜鳴洪鍾建五旂義和司日顏倫奉
輿樂往昔之遺風喜虞舜之所耕瞰帝唐之嵩高兮
眎隆周之大寧叱風伯於南北呵雨師於西東參天
地而獨立廓蕩蕩其無雙

頌後漢班固東巡頌曰竊見巡狩岱宗上稽帝堯中

述世宗遵奉世祖禮儀備具動自聖心是以明神屢
應休徵仍降不勝狂簡之情謹上岱宗頌一篇曰若
稽古在漢迪哲聿修厥德憲章丕烈翻六龍較五輅
齊百僚陶質素命南重以司歷厥中月之六辰備天
官之列衛盛輿服而東巡又南巡頌曰惟漢再命系
葉十一帝典協景和則天經郊高宗光六幽通神明
既禘祖於西都又將袷于南庭是時聖上連天官之
法駕憑列宿而贊元

後漢崔駰東巡頌曰伊漢中興三葉於皇維烈允迪
厥倫矩坤度以範物規乾則以陶鈞於是考上帝以

質中總列宿於北辰開太微敞禁庭延儒林以咨詢
岱嶽之事于時典司耆耄載華抱實徵爾而造曰盛
乎大漢世增其德此神人之所慶幸海內之所想思
頌有喬山之征典有徂嶽之巡時邁其邦民斯攸勤
不亦宜哉乃命太僕訓六駟閒路馬戒師徒於是乘
輿登天靈之威路駕太一之象車升九龍之華旗建
掃霓之旌旄哀胡耆之元老賞孝行之畯農

後漢馬融東巡頌曰允迪在昔紹烈陶唐殷天衷克
搖光若時則運瓊衡敷六典經八成肆類乎上帝實
柴乎三辰禋祀乎六宗祇燎乎羣神遂發號羣司申

戒百工卜筮稱吉著龜襲從南征有時馮相告祥清
夷道而後行曜四國而揚光展聖義於巡狩喜圻時
而詠八荒指宗嶽以爲期固岱神之所望散齋旣畢
越異良辰棫櫨增構烈火燔燃暉光四煬焱爛薄天
蕭香肆升青煙習雲珪璋戔戔犧牲潔純鬱鬯宗彝
明水玄樽空桑孤竹咸池雲門六八匠變神祇竝存
詔後漢張衡東巡詔曰惟二月初吉帝將狩于岱嶽
展義省方觀民設教率羣賓備法駕以祖于東門屆
于靈宮是日也有鳳雙集于臺壬辰祀上帝于明堂
帝曰咨予不材爲天地主慄慄翹翹百僚萬幾心之

謂矣孰朕之勞上帝有靈不替朕命誕敢不祗承凡
庶與祭於壇墀之位者曰懷爾邦君寔願先帝載厥
大宗以左右朕躬羣臣曰帝道橫被旁行海表一人
有違萬民賴之從巡助祭者茲惟嘉瑞乃歌曰皇皇
者鳳通玄知時萃于山趾與帝邀期吉事有祥惟漢
之祺帝曰朕不敢當亦不敢蔽天之吉命

籍田

說文曰帝籍千畝者使民如借故謂之藉

毛詩曰載芟春籍田而祈社稷也

周官曰上春詔王后帥六宮之人而生穰穡之種而

獻之于王又曰甸師率其屬而耕耨王藉以時入之以供粢盛

禮記曰孟春之月天子乃以元日祈穀于上帝天子親載耒耜帥三公九卿諸侯大夫躬耕帝籍天子三推三公五推卿諸侯九推庶人終畝反乃執爵於太寢命曰勞酒又曰天子耕於南郊諸侯于東郊又曰天子爲籍千畝冕而未絃躬執耒以事天地山川以爲醴酪粢盛於是乎取之敬之至也諸侯百畝冕而未絃

梁五禮籍田儀注曰其田東去宮八里遠十六里爲

千畝天子耒耜一具九卿耒耜九具立方壇以祠

先農

應劭漢官儀曰天子升壇公卿耕訖嗇夫下種籍田千畝亦曰帝籍亦曰親耕亦曰王籍又曰東耕之日親率公卿戴青幘載青車駕蒼馬公卿以下車駕如常法

五經要義曰天子籍田千畝孟冬啓蟄既郊之後率公卿大夫而親耕焉所以先百姓而致孝敬

國語曰宣王即位不籍千畝號文公諫曰夫民之大事在農上帝之粢盛於是乎出民之蕃庶於是乎生先時九日太史告稷曰陽氣俱蒸土膏其動即以告

王王即御事王耕一耒班三之庶人終乎千畝王不聽師敗于姜戎也

論衡曰立春東耕爲土象人男女各一執耒鉏錢或立土牛象人土牛未畢而耕也從氣應時示帥也

漢書文帝詔曰夫農天下之本其籍田朕親率耕以給宗廟粢盛

東觀漢記曰永平十三年二月耕籍田畢賜觀者食有一諸生前言善哉文王之遇太公也上書版曰生非太公予亦非文王

詩宋顏延之侍東耕詩曰題封經地域辰角麗天部